

I romni yazdindzhas ko lil sichko – sar ipalde la khamni, sar ko droma phirdzhas korkori, sar geli te molinel pes te irinen la khere, a ola marde la, pala ipalde la, kate uli sora ... sichko yazdindzhas pe romeske. I i day merela. I tsikni chhay rovela, pishtinela:

– Dale, dale!

Avena o manusha i parunena e daya. I chhay tsidela te rodel pe dades, rovela i phirela ko droma. Kas sar dikhela, phuchela:

– Pendzharena li dalke romes?

Phuchela, ama nikon na vakerela lake, nikon na pendzharela e dades. Bilem o lil na lena lakere vastendar. Oy veche, bokhali, ekh, duy, trin dives sar maima phirela. Pharo si lake, bi dayakoro achhili, pe dades nashti arakhela, rovela, kale asva chhorela. E, ama e Devleskoro plani nikon na zhanela, e Devleskere droma nikon na pendzharela. O dadoro, uklela pe vurdeste, ka zhal dekhate. A i chhayori atar bokh garek, sar maima ko droma, kalyola anglal lake yakhende.

Lachhes, ama upral avela o dad, uryala o vurdo. I chhay garek, te nashel atar o vurdo, ta napravo ko vurdo chhivela pes. Chalavela la o dad e vurdesa, thay chhay perela ko drom. O dad pi godi ikaldzhas – hulela, lela la, uklyavela la ko vurdo i pravo ki bolnitsa ingalela la. Rovala upral late, e Devleske molinela pes zhivdi te achhol.

– Me sinom – phenela – kabahati, me butindzhom la, me chalavdzhom la, me ka mudaravas la!

Dela e doktoren pares, phagavela, te sascharen la. I chhay, po-nafela ovela lake i trebe te phutren la po sigo, soske ka merel. A nay-baro savka doktori si lakoro dad. Trebe ov te phutrel la. I ov da, so ka kerel mo choro, astarel, phutrel e chhaya, lachharel la, sascharel la. Katar i bolnitsa napravo khere ingalel la peske. Kerel lake bari, shukar odaya, uryavel la, astarel manushen te arakhen la shukarestar, po-shukar. Lilyas te arakhel la peske. I chhay baryola, achhola shuk – shukarengiri, gaytilen shukar. O dad garavela e chhaya pe dayatar, pe dadestar, pe manushendar.

Nakhena desh bresh. I chhay achhola deshuefta breshengiri. Ake, efta arakhlyas la, deshuefta achhola. O dad phenela lake:

– Tu chedo, akana deshuefta bresh ulyan! Mangava te kerav tuke akana ekh baro dzhumbishi kay pherdzhan kalka bresha. Ka khidav bute manushen, habe-piibe ka dav, sar perela pes thagarnyake.

– A-a-a, me darava manushendar! Ma ker mange nishto. Berekyat kay arakhlyan man, baryardzhan man, soske me sinomas korkori, tsikori, achhilyom bi dayakoro. Mi day muli, ama vasiyeti muklyas mange, me